

Consillu Armânjloru

(Consillu Makedonarmânjloru)

www.makedonarman-council.org e-mail : info@makedonarman-council.org

Bulitinu Informativu

Tu 5-li di Brumaru 2011, Skopje / RM, s-dizvârti Adunarea Gheneralâ di aradhâ di estanu a Consillui MakedonArmânjloru (CMA). Ashi cumu spuni statutlu CMA, andamusea gheneralâ di-aradhâ prindi sâ s-tsânâ unâ oarâ tru-anu.

Ditu numirlu di 35 di diligats tsi prindi sâ-lj pitreacâ farili membri la cathi adunari gheneralâ, 27 diligats loarâ parti la aestâ andamusi gheneralâ di-aradhâ shi sh-deadirâ votlu ti tuti apofasli tsi s-loarâ.

Andamusea CMA di Skopje fu dishcljisâ ti tuts atselji armânji tsi au sinferu trâ problematica armâneascâ. Cama di 70 di inshi loarâ parti la aestâ andamusi dishcljisâ.

Estanu s-bitiseashti mandatlu (2008-2011) trâ cumândâsearea CMA aleaptâ aoa sh-trei anji (prezidentu CMA – Yiani Mantsu / grâmâticu ghegeneralu CMA – Niculaki Caracota).

La aestâ andamusi prindea sâ s-aleagâ sh-naua cumândâseari trâ yinatorlu mandatlu (trei anji). Trâ itia ama câ nica nu s-au faptâ andamusli ghegeneralu la tuti farili membri tu consilu, andamusi iu prindi sâ s-aleagâ sh-diligatslji trâ mandatlu ditu yinatoru tsi s-ljia parti kiro di trei anji la andamusli di consilu, Biroulu Executivu CMA lo apofasea s-pingâ aesti nali alidzeri pânâ di prumvearâ (Martsu – Apriiru 2012), kiro tu cari aesti fari membri sh-loarâ borgea s-bitiseascâ andamusli ghegeneralu di farâ.

Tu ahurhita ali andamusi, prezidentulu CMA – Yiani Mantsu – pârâstâsi raportulu / giueapea trâ activitatea tsi u avu Biroulu Executivu tu kirolu 2008-2011.

Ditu aghenda di lucru (aradha di cuvendzâ) ali andamusi, thimisimu muabetsli tsi s-adrarâ andicra di andamusea tsi u avurâ prezidentsâlji Traian Băsescu (Rumâni) sh Georgi Ivanov (R. Makidunia) tu kirolu ditu soni, andicra di reactsiili ditu mass-media mutrindalui luyursearea armânjloru ditu R. Makidunia ca etnii di arâzgâ rumuneascâ. Nu easti prota oarâ tsi s-featsi ahtari shimâtă mutrindalui aestâ problematicâ.

Consillu Armânjloru

(Consillu Makedonarmânjloru)

www.makedonarman-council.org e-mail : info@makedonarman-council.org

S-lo apofasea ca di partea CMA sh-di partea a fariloru armânjloru ditu Rumânii sh R. Makidunia s-hibâ pitricuti cărtsâ câtâ prezidentsia alushtoru craturi, trâ limbidzarea luyuriljei andicra di arâzga popullui armân.

Trâ sinferu trâ sutsatili armâneshtsâ tsi nu suntu membri tu CMA, ama cilâstâsescu trâ avigljearea, acrishtearea sh-prumuvarea a limbâljei armâneascâ, a culturâljei sh-a adetsloru, a spiritului armânescu spetsificu tu cathi cratu iu armânjlji bâneadzâ, Adunarea Gheneralâ CMA di Skopje lo apofasea s-aproaki aesti sutsati tu consilu. Cumândâsearea CMA va dâmândâ alushtoru sutsati tu shcurtu kiro, data panâ cându prindi sâ s-facâ câftarea trâ amintarea a hariljei di membru CMA.

Cu aestâ apofasi, trâ cari cândâsirâ tuts diligatslji cu ndreptu di votu, s-adusi sh-unâ alâxeari tu statutlu CMA mutrindalui Art. 20 (vedz Statutlu arâdâpsitu tu site-lu a consillui) :

www.makedonarman-council.org

Alti alâxeri tu statutu, cata cumu easti sh-atsea ligatâ di zborlu “minuritati natsiunalâ” va hibâ ngrâpsiti la giudico dupu andamusea di prumvearâ 2012 cându va hibâ aleaptâ sh-naua cumânduseari CMA, trâ mandatlu ditu yinatoru, 2012 – 2015.

Cumândâsearea CMA haristuseashti a fratsloru ditu R. Makidunia trâ buna organidzari, trâ copuslu sh-andrupâmintulu tsi-lu deadirâ ca aestâ andamusi di consilu di Skopje sâ s-dizvârteascâ cu multâ harauâ sh-multu sinferu trâ yinatorlu Armânamiljei.

Consillu MakedonArmâniloru
Biroulu di Cumândâseari

tu 10-li di Brumaru, 2011

(Bulitinu Infurmativu Nr. 31)